



山川典第二百九十七卷

蘄水部彙考

水經之蘄水

蘄水源出今湖廣黃州府蘄州城北四流山西南流合鉅陂水至蘄州入于大江

考

按水經蘄水出江夏蘄春縣北山

注

山卽近柳也

近宋本作蘄

水首受希水枝津西南流歷蘄山出蠻中

故以此蠻爲五水蠻水卽謂巴水也又赤亭水西歸水蠻左馮居咀藉山川世爲抄暴宋世沈慶之於西陽上下誅伐蠻夷卽五水蠻也

南過其縣西

注

晉改爲蘄陽縣縣從江州置大陽戍後齊

安郡移治於此也

又南至蘄口南入于江

注

蘄水南對蘄陽州入于大江謂蘄口洲上有蘄陽

縣徙

按續文獻通考湖廣黃州府蘄河在蘄州北發源大浮山西流入赤東湖

高溪在蘄州東北源

出白巖山南入蘄河

按湖廣通志黃州府四流山在蘄州境內山巔逕邇有水南流入蘄水西流亦入蘄水北流至壽州東流入安慶府太湖 鉛鉞水在蘄州治南源出樞梨山入蘄湖

按黃州府志蘄州蘄河在州城北南流過州城西又南至蘄口入于江

雲夢澤部彙考

禹貢荊州之雲夢

雲夢澤在今湖廣荊州府雲夢縣城南跨江南北方八九百里連延華容枝江江夏安陸之地自古所稱大澤惟此爲最分言之則爲二合言之則惟一也

考

按書經夏書禹貢雲土夢作父

疏

地理志南郡華容縣南有雲夢澤杜預云南郡枝江縣西有雲夢

城江夏安陸縣西亦有雲夢

蔡傳

雲夢方八九百里跨江南北華容枝江江夏安陸皆其地也

按周禮夏官職方氏正南曰荊州其澤藪曰雲夢

訂義

易氏曰漢志華容縣有雲夢澤在南然司馬相

如言雲夢澤方八九百里則雲夢非止一澤隨所在而爲之名左傳定公四年楚子涉睢濟江入於

雲中則知在江之北者爲雲又昭公三年楚享鄭伯田江南之夢則知在江之南者爲夢禹貢言雲土夢作父蓋南北高下不等故江北之雲方見土而江南之夢已作父其勢然也鄭鍔曰輿地廣記云今雲夢澤在安陸縣黃氏曰雲夢跨江南北今荆南岳州界

按爾雅釋地十藪楚有雲夢

注

今南郡華容縣東南巴丘湖是也

疏

周禮荊州云其澤藪曰雲夢鄭

註云雲夢在華容禹貢云雲土夢作父昭公三年左傳楚子與鄭伯田于江南之夢又定公四年楚子涉睢濟江入于雲中杜預云南郡枝江縣西有雲夢城江夏安陸縣東南亦有雲夢城或曰南郡華容縣東南有巴丘湖江南之夢也雲夢一澤而每處有名者司馬相如子虛賦云雲夢者方九百里則此澤跨江南北亦得單稱雲單稱夢也

按史記司馬相如傳楚有七澤其小者名曰雲夢雲夢者方九百里其中有山焉其山則盤紆弟鬱隆崇嶽岑巖參差日月蔽虧交錯糾紛上干青雲罷池陂陀下屬江河其土則丹青赭堊雌黃白垺錫碧金銀衆色炫燿昭爛龍鱗其石則赤玉玫瑰琳瑯琨瑀瑊瑜元厲璆石武夫其東則有蕙圃衡蘭芷若射干穹窮昌蒲江離麋蕪諸蔗傳且其南則有平原廣澤登降隨靡案衍壇曼緣以大江

限以巫山其高燥則生葳蕤苞荔薛莎青蘋其卑濕則生藏蓂兼葭東薔雕胡蓮藕菰蘆菴蘭軒芋
衆物居之不可勝圖其西則有湧泉清池激水推移外發芙蓉菱華內隱鉅石白沙其中則有神龜
蛟鼉瑁龜鼈其北則有陰林巨樹梗枏豫章桂椒木蘭蘂離朱楊櫨梨棗橘柚芬芳其上則有
赤猿蠼螋鵪鶉孔鸞騰遠射干其下則有白虎元豹蠃蜒獬豸象野犀窮奇獫狁

按漢書地理志南郡華容

注

雲夢澤在南荊州薺夏水首受江東入沔

按後漢書郡國志南郡華容侯國雲夢澤在南

注

杜預曰州國在縣東枝江縣有雲夢城江夏安陸

縣東南有雲夢城或曰華容縣東南亦有雲夢巴丘湖江南之雲夢也爾雅十薺楚有雲夢郭璞曰
巴丘湖是也

按岳陽風土記雲夢澤實字記曰半在江南半在江北其水中土丘半出杜預所謂雲夢薺巴丘湖
是也酈道元謂自江陵東界爲雲夢薺孟浩然詩氣蒸雲夢澤然則夾江南北皆其地也

按方輿勝覽湖北路岳州雲夢澤禹貢曰雲土夢作父則是二澤也按左傳桓公四年載邳夫人使
棄諸夢中言夢而不言雲定公四年載楚子涉睢濟江入于雲中言雲而不言夢正與禹貢合杜預

註雲夢跨江之南北漢陽圖經雲在江之北夢在江之南

按續文獻通考湖廣承天府雲夢澤在沔陽州東又在荊門州北接連德安府雲夢縣界

德安

府雲夢縣在安陸縣南五十里雲夢二澤雙舉故名

按德安府志雲夢澤在雲夢縣舊志云去安陸南五十里今縣治去安陸六十里蓋安陸境山自鄆
阨蔓延至此乃盡而迤南數郡大澤衍溢實自此始昔故以此名縣云按禹貢及諸家傳記雲夢澤
方八九百里跨江南北華容枝江江夏安陸皆其地合言之則爲一分言之則二澤也

安陸縣

涓河遶城西流入雲夢澤

按荊州府志雲夢縣南皆大澤雲夢澤自此始故名之禹貢雲土夢作又本二澤然二澤合稱其來
已久傳記所指合析不同周禮職方藪曰雲夢司馬相如傳楚有七澤其小者名雲夢方八九百里
南有平原廣澤緣以大江而班生地志云華容枝江若江夏之安陸皆有雲夢裴駟云孫叔敖激沮
水作此澤張揖云楚藪也在南郡華容縣郭璞云江夏安陸有雲夢枝江亦有之華容又有巴丘湖
俗云卽古雲夢澤張揖云在華容者指此春秋文耀鉤云大別以東至富春九江衡山皆雲夢地唐

安審暉敗唐兵於雲夢澤中史炤曰雲夢澤名祝穆曰雲夫人棄子文於夢中言夢不言雲楚子避吳入于雲中言雲不言夢二事皆在安陸一以爲雲一以爲夢凡此皆合稱也惟胡三省辨誤禹貢雲夢孔安國云在江南左傳楚王以鄭伯田江南之夢漢志雲夢澤在華容南沈丘云雲卽今玉沙監利景陵等縣夢卽今公安石首建寧等縣漢陽志云雲在江之北夢在江之南此則析而稱之按杜預云雲夢跨江南北而蔡沉書傳云雲夢方八九百里跨江南北華容枝江江夏安陸皆其地合而言之則一別言則爲二澤也禹貢云雲土夢作乂蓋澤勢有高卑故水落有遲速人工有早晚爾此說得之

雲夢澤部藝文一

雲夢賦

元何克明

駕洞庭之飛艗覽熊繹之故墟偉雲夢之鉅澤控天南之一隅爾其雄跨大江延袤千里水滸滸其漸漬山龍龍而迤靡卻五嶺瘴煙而莫近豈五丈秋風之可擬草木鬱其暢茂禽獸樂其遊憩原田每每人獲耒耜之利車馬駢駢歲閏蒐糲之備其產則橘柚菁茅竹箭金錫虎豹貔貅可以應廷實

軍容之需麋鹿魚鼈可以爲乾豆賓庖之給實荊州之府庫亦中原之羽翼岳陽大別擅名勝千古
今夏口江陵分形勢于區域當其煙橫北渚日暮蒼灣仙僊巨靈神遊其間鼓瑟鏗鏘寫幽怨于湘
女鈞天縹緲奏廣樂于軒轅水天一色落霞孤鶩風月雙清歸鶴啼猿岸芷汀蘭香溢靈均之離騷
廣谷大川地壯召虎之于蕃身歷茲土心馳往古奠我民居實維神禹當懷山襄陵之際任手胼足
胝之苦及其雲土而夢作父于是考圖而貢可數暨夫荆懲之詩不歌而楚氛之惡是怙於以田獵
於耀武何涼德之不長終漢室之敗土矯彼淮陰驕力跋扈致乘輿之鳴鑾烹良犬於得免信乎地
不足以設險德終然之可據天眷吾皇奄有寶區雖茲澤之曠邈果見侈於輿圖嗟予忝於楚產期
觀光於帝都極鋪張於雲夢猥徒儕於腐儒吞八九於胸中曾不芥蒂於相如

雲夢賦

丘堂

繫東南之奧區維雲夢之二澤盪兩儀兮同開渺千里兮莫極爲上流之淵藪跨大江之南北吐霧
雨兮吸烟雲浮乾坤兮浴日月蓋其形勢汗漫風景森茫連淮通蜀互荆控揚并包漢沔綿絡沅湘
莽莽荻葦之岸漠漠菰蒲之鄉澹煙林兮明滅浩月渚兮汪洋洲重淵兮掩映浦隔汀兮相望鴻鴈

鸕鷀之所集狐兔麋鹿之所藏漁歌互答獵唱同行樵牧彌野商賈連樁貨財之富聞於四方至若
羽毛齒革純榦枯柏菁茅竹箭之由產黃金丹砂之自出雖僻處於遐陬實有資於上國是故楚子
之所常獵漢高之所僞遊宋玉遠慕而特赴太白來觀而久留少陵調洞庭之潛杜牧吟澤南之州
凡騷人墨客之來往必爲之徘徊而賡酬于時有翰林主人者曰昔子虛詫齊以雲夢之事而見辱
於烏有先生今而賦之豈欲爲雲夢解嘲也耶主人於是凭高眺遠攬今撫昔臨風俯仰喟然嘆息
曰嗟夫子以爲今之雲夢猶昔之雲夢乎非也吾聞古往今來否極必泰世運旣回地氣亦改昔春
秋之季世如糜爛而波潰彼區區之齊楚各誇強而詫大惟田獵之是務惟原獸之是愛想雲夢於
此時爲王靈所不屑方今聖王御極天下爲家八紘一網四極一置遊畋之事不動於念慮好生之
德周浹于邇遐遂使羽毛鱗介自飛自走而雲夢之魚鳥如在文王之沼囿勾茅萌柝自生自育而
雲夢之草木如在陶虞之陽谷加以菱芡彌望麻黍陰翳悉令蒐獮之場化爲耕食之地是古之雲
夢爲民之病今之雲夢萬民之利也惜相如以俊逸之才不遇今太平之世雖是楚王雲夢之陋而
又逢武帝上林之意況登高能賦可爲大夫當宣雨露九天之澤爲洗雲夢千古之汚於是諸生欣

然執翰操觚願鋪張今日之所遇起子虛烏有而告諸

雲夢賦

陳誼高

覽東南之巨浸兮渺乾坤其若浮罔盡夫荆之爲藪兮蹇將泝其源之流惟九州之有澤兮羌荆州
兮雲夢表二澤之互衍兮跨南北以相控原夫澤之爲量兮水既瀦而不溢波衆流之交匯兮自適
適以秩秩若宇宙之再造兮揭禹功於九年俾五行之攸敘兮乃迄今兮安其天吾乘流而櫟其側
兮極空摩而潤淵洲莽莽而不盡兮汀藹藹而含煙亂風颿之往來兮通巴峽於湘川綰青山之一
髻兮結襄漢之袞延當春波之汎汎兮捐四際於一區及寒濤之侵碧兮勢已殺於兩湖征鴻飛而
沒影兮涵元氣於冥無舞魚龍之天矯兮雲垂垂而奔趨映殘霞之錯落兮祝融蒼茫而欲晡原桑
麻之旃旃兮隰禾黍之離離岸蘭芷之菲菲兮芳渚綠其江蘼緬懷楚子之遊田兮佩明月而冠雲
排千乘之旌騎兮馳紛驟於水濱知走獸之是獲兮豈得非熊以致君嗟漢高之僞遊兮未必臨幸
乎此中笑齊封之雖大兮終愧夫汨羅之孤忠聽鈞天于洞野兮居八九於心胸洗往事之芥蒂兮
乃北望夫清都瞻雲夢於萬里兮奠南服於一隅其藪澤之所聚兮皆材用之所需決天下之疑兮

有大龜之納錫用天下之武兮有弩楫之勁直成天下之禮兮況菰茅之生植矧秉心以淵注兮攄朝宗之萬一乃爲之歌曰雲蒸漦兮流海澨士楚產兮貢天府秋風颯兮木葉下洞庭波兮恍萬舞俯伏兮端門奏簫韶兮帝所

雲夢澤部藝文二

詩

雲夢

明李夢陽

晚行雲夢澤雲起失湖村歷歷橫江雨冥冥遠岫昏龍鱗當馬吼鷗鷺背人翻欲擬浮湘作吾生異楚魂

賦得氣蒸雲夢澤

鄒觀光

洞庭渺渺鬱葱葱八百湖山一氣中莫怪胸吞曾不芥一杯滄海漾鴻濛

賦得天寒夢澤深

前人

湖天黯澹蕭瑟蒲霜氣淒嚴鳬鴈呼淵底魚潛堅不餌羊裘歸去釣臺孤

雲夢澤部選句

唐孟浩然臨洞庭詩氣蒸雲夢澤波撼岳陽城

李端江上送客詩故人南去漢江陰秋雨瀟湘

雲夢深

雲夢澤部紀事

戰國策楚王遊於雲夢結駟千乘旌旗蔽天

蒙穀負鷄次之典以浮於江逃於雲夢之中

德安府志景差嘗至雲夢澤後至蒲騷見宋玉曰昨到雲夢喜見楚山之碧眼力頓明

北夢瑣言唐襄陽孟浩然與李太白交遊元宗徵李入翰林孟以故人之分與有彈冠之望久無消息乃入京謁之一日元宗召李入對因從容說及孟浩然李奏曰臣故人也見在臣私第上令急召賜對俾口進佳句孟浩然誦詩曰北闕休上書南山歸敝廬不才明主棄多病故人疎上意不悅乃曰未曾見浩然進書朝廷退黜何不云氣蒸雲夢澤波撼岳陽城緣是不降恩澤終於布衣而已

雲夢澤部雜錄

戰國策蘇秦說趙王曰大王誠能聽臣楚必致橘柚雲夢之地

漢書司馬相如傳子虛賦僕樂王之欲夸僕以車騎之衆而僕對以雲夢之事也僕對曰臣聞楚有

七澤嘗見其一未觀其餘也臣之所見蓋特其小小者爾名曰雲夢雲夢者方九百里其中有山焉
抱朴子小人之赴也若決積水於萬仞之高隄而放烈火乎雲夢之枯草焉

雲夢澤部外編

漢陽府志楚襄王遊雲夢夢婦人名瑤姬曰我夏帝之季女封于巫山之陽臺精魂爲芝精而食之
則與夢期

山川典第二百九十八卷

洞庭湖部彙考

巴陵之洞庭湖

洞庭湖在今湖廣境內東北屬岳州府西南屬常德府吞赤沙連青草橫互七八百里合沅澧辰敘酉澧資湘九水俱匯于此日月若出沒于其中浩浩蕩蕩真宇內大觀也

考

按書經夏書禹貢荆及衡陽惟荊州江漢朝宗于海九江孔殷沱潛既道

孔傳

江於此州界分爲九道

甚得地勢之中潯陽地記云一曰烏白江二曰蚌江三曰烏江四曰嘉靡江五曰畎江六曰源江七

曰廩江八曰提江九曰箇江張須元緣江圖云一曰三里江二曰五州江三曰嘉靡江四曰烏土江

五曰白蚌江六曰白烏江七曰箇江八曰沙提江九曰廩江參差隨水長短或百里或五十里始于

鄂陵終于江口會于桑落洲太康地記曰九江劉歆以爲湖漢九水入彭蠡澤也

疏

傳以江是此水

大名九江謂大江分而爲九猶大河分爲九河故言江於此州之界分爲九道訓孔爲甚殷爲中言

甚得地勢之中也。鄭云殷猶多也。九江從山谿所出其孔衆，多言治之難也。地理志九江在今廬江。潯陽縣南皆東合爲大江，如鄭此意，九江各自別源，非大江也。下流合于大江耳。然則江以南水無大小，俗人皆呼爲江，或從江分出，或從外合來，故孔鄭各爲別解。蔡傳九江卽今之洞庭也。水經言九江在長沙下雋西北。楚地記曰：巴陵瀟湘之淵在九江之間。今岳州巴陵縣卽楚之巴陵。漢之下雋也。洞庭正在其西北，則洞庭之爲九江審矣。今沅水漸水、沅水、辰水、敘水、酉水、澧水、資水、湘水皆合于洞庭，意以是名九江也。孔甚殷正也。九江水道甚得其正也。按漢志九江在廬江郡之潯陽縣。潯陽記九江之名：一曰烏江，二曰蚌江，三曰烏白江，四曰嘉靡江，五曰畎江，六曰源江，七曰廩江，八曰提江，九曰箇江。今詳漢九江郡之潯陽，乃禹貢揚州之境，而唐孔氏又以爲九江之名起于近代，未足爲據。且九江派別取之邪，亦必首尾長短大略均布，然後可目之爲九。然其一水之間當有一洲，九江之間沙水相間，乃爲十，有七道而今潯陽之地將無所容。況沙洲出沒其勢不常，果可以爲地理之定名乎？設使派別爲九，則當曰九江既道不應曰孔殷於導江。當曰播九江不應曰過九江。反覆參考則九江非潯陽明甚。本朝胡氏以洞庭爲九江者，得之曾氏亦謂導江曰過九江，至于東陵。

東陵今之巴陵今巴陵之上卽洞庭也因九水所合遂名九江故下文導水曰過九江經之例大水合小水謂之過則洞庭之爲九江益以明矣大新安陳氏曰江漢朝宗于海卽繼曰九江孔殷導江不曰播九江而曰過九江則大江自大江九江自九江可見孔氏所謂江于此分爲九道者其非明矣證以導江東至于澧過九江至于東陵則九江當在澧州之下巴陵之上而不在潯陽與今之江州尤明矣朱蔡以洞庭湖當之辨証詳明從之可也謂江南凡水皆呼爲江禹時澧州之下巴陵之上自有九水今年代久遠陵谷變遷不可以今水証古水而闕之亦可也

按山海經海內東經湘水出舜葬東南陬西環之入洞庭下一曰東南西澤註洞庭在長沙巴陵今吳縣南山下有洞庭穴道潛行水底云無所不通號爲地脈 沅水出象郡鄣城西入下雋西合

洞庭中

按水經湘水注湘水左逕鹿角山東右逕謹亭戍西又北合查浦又北得萬浦咸湘浦也側湘浦北有萬石戍湘水左則沅水注之謂之橫房口東對微湖世或謂之麋湖口也右屬微水卽經所謂微水經下雋者也西流注于江謂之麋湖口也水又北逕金浦戍北帶金浦水湖澤也湘水左則澧水

注之世謂之武陵江凡此四水同注洞庭北北會大江名之五渚戰國策曰秦與荆戰大破之取洞庭五渚也湖水廣圓五百餘里日月若出沒于其中山海經云洞庭之山帝之二女居焉沅澧之風交湘之浦出入多飄風暴雨湖中有君山編山君山有石穴潛通吳之包山郭景純所謂巴陵地道者也是山湘君之所遊處故曰君山矣昔秦始皇遭風于此而問其故博士曰湘君出入則多風秦王乃赭其山漢武帝亦登之射蛟于是山東北對編山山多簾竹兩山相次去數十里迴峙相望孤影若浮湖之右岸有山世謂之笛島頭石石北右會翁湖口水上承翁湖左合洞浦所謂三苗之國左洞庭者也

按長沙志洞庭之水瀦七百里在岳州城西

按南遷錄岳州洞庭西岸有沙洲堆阜隆處卽青草廟廟下一湖之內中有此洲南名青草北名洞庭所謂重湖也

按岳陽風土記樂史言大江在巴陵東北流入洞庭今洞庭水會于江非江流入洞庭也荆江出巴蜀自高注下濁流洶湧夏秋暴漲則逆泛洞庭瀟湘清流頓皆混濁岳人謂之翻流水南至青草湖